

दिनांक 29.08.2024

समय: 18.45 बजे

आकाशवाणी जयपुर—अजमेर
प्रादेशिक समाचार

- मुख्यमंत्री भजन लाल शर्मा कानून—व्यवस्था ने राज्य सरकार की सब ऊं ऊंची प्राथमिकता बतायी—राज्य स्तर रा पुलिस सम्मेलन रो उद्घाटन कीनीं
- राज्य सरकार प्रदेश मांय 2 हजार 406 किलोमीटर लम्बा 8 नुवा ग्रीनफील्ड एक्सप्रेस वे बणावण सारू डीपीआर तैयार करण री मंजूरी दीनीं
- हॉकी रा जादूगर मेजर ध्यानचन्द रा जन्म दिन रे मौके राष्ट्रीय खेल दिवस रा तहत प्रदेश मांय न्यारा—न्यारा कार्यक्रम राख्यी ज्यां
- प्रदेश मांय हाल तांई सामान्य ऊं डोढ़ी ऊं बत्ती बिरखा व्ही—दौसा ज़िला मांय सब ऊं बत्ती 1 हजार 148 मिलीमीटर बरसात दर्ज करी ज्यीं

000

मुख्यमंत्री श्री भजनलाल शर्मा कह्यो है के वां रा राज मांय कानून व्यवस्था बणायी राखण माथे खास ध्यान दियो ज्यो है अर कानून व्यवस्था ने मजबूत बणावण सारू पुलिस तंत्र ने और मजबूत कर्यो जावेलां वे आज जयपुर मांय सारू व्ह्या पुलिस रा राज्य स्तर रा अहलकारां रा दो दिन रा सम्मेलन रा उद्घाटन सत्र मांय बोल रह्या हां मुख्यमंत्री कह्यो के साइबर अपराधां ऊं मिल र अपराध करण तांई री भांत—भांत री चुनौतियां रो सामो करता थकां पुलिस ने और मजबूत बण र काम करणो व्हेलां वे पुलिस विभाग ऊं साइबर अपराधां

ने खत्म करण अर नौजवानां मांय नशा री लत री रोकथाम बाबत् काम करण माथे जोर दीनों मुख्यमंत्री भ्रष्टाचार भ्रष्टाचार ने बिल्कुल बर्दाश्त नी करण री नीति अपनावण बाबत् कह्यो कार्यक्रम मांय गृह राज्य मंत्री जवाहर सिंह बेदम कह्यो के राज्य ने अपराध मुक्त बणावण सारू पुलिस लगातार काम कर रही हैं ई मौके मुख्य सचिव सुधांश पंत कह्यो के अपराधां माथे काबू करण रा बारा मांय प्रदेश मांय कर्या जा रह्या काम ऊं देश मांय राजस्थान री बेहतर छवि बणी हैं दो दिन रा ई सम्मेलन मांय **‘पुलिसिंग विद एक्सीलेंस— द वे फॉरवर्ड’** मुद्दा माथे नुवा आपराधिक कानून, आर्टिफिशियल इन्टेलीजेंस टूल्स, डीप फेक, साइबर सिक्योरिटी अर नशीली चीजां री तस्करी री रोकथाम सरीखा मुद्दा माथे न्यारा—न्यारा सत्र राख्या जावेलां

000

उपमुख्यमंत्री दिया कुमारी ने राज्य मांय 2 हजार 406 किलोमीटर री लम्बाई मांय 8 नुवा ग्रीनफील्ड एक्सप्रेस वे बणावण सारू डीपीआर तैयार करण की मंजूरी दे दीनी हैं डीपीआर बणावण सारू 30 करोड़ रुप्या मंजूर करी ज्या हैं बजट मांय करी ज्या ऐलाण रे मुजब कोटपुतली—किशनगढ़ एक्सप्रेस वे, जयपुर—भीलवाडा एक्सप्रेस वे, बीकानेर—कोटपुतली एक्सप्रेस वे, ब्यावर—भरतपुर एक्सप्रेस वे, जालौर—झालावाड़ एक्सप्रेस वे, अजमेर—बाँसवाड़ा एक्सप्रेस वे, जयपुर—फलौदी एक्सप्रेस वे अर श्रीगंगानगर—कोटपुतली एक्सप्रेस वे, बणावण रो प्रस्ताव हैं दिया कुमारी कह्यो के अ एक्सप्रेस—वे बण जावण ऊं प्रदेश रो माली विकास और तेज व्हेलां वे कह्यो के अ एक्सप्रेस वे बणबा ऊं प्रदेश रा किसानां री पहुंच मोटा बाजारां ताई व्हे सकेला, जिण ऊं वां री आमदनी मांय बधोतरी व्हेलां

000

राइजिंग राजस्थान’ ग्लोबल इन्वेस्टमेंट समिट 2024 ई साल 9 ऊं 11 दिसंबर ताई जयपुर मांय राख्यो जावेलां इण री जाणकारी लोगां ताई पूगावण रा मकसद ऊं पहलो रोड शो काल मुंबई मांय व्हेलां इण री अगुवाई मुख्यमंत्री भजन लाल शर्मा करेलां ई कार्यक्रम रे दौरान

निवेश ऊं जुड़्या केई करार माथे सही करी जावेला अर राइजिंग राजस्थान वेबसाइट री सरूआत करी जावेलां कार्यक्रम मांय उद्योग मंत्री कर्नल राज्यवर्धन राठौड़, मुख्य सचिव सुधांश पंत अर केई आला अहलकार ई सिरकत करेलां

000

राज्यपाल हरिभाऊ किसनराव बागड़े साफ़ आब-ओ-हवा सारू कुदरती तरीका ऊं खेती करण माथे जोर दीनो हैं वे आज बीकानेर रा कृषि विश्वविद्यालय मांय 'प्राकृतिक खेती पर जागरूकता कार्यक्रम' मुद्दा माथे दो दिन री राष्ट्रीय संगोष्ठी रा उद्घाटन सत्र मांय बोल रह्या हां वे कह्यो के पाणी बचावण माथे खास ध्यान दे र गांव रो पाणी गांव मांय ही रोकण री कोशिश करी जावणी चाहिजें ई मौके केंद्रीय विधि अर न्याय मंत्री अर्जुन राम मेघवाल कह्यो के खेती-बाड़ी अर किसानां रा भला माथे प्रधानमंत्री नरेंद्र मोदी सब ऊं बत्तो ध्यान दे रह्या हैं मेघवाल मोटा अनाज ने बधावो देवण री जरूरत माथे जोर दीनों वे कह्यो के फोगला, केर, सांगरी अर तुंबा माथे अनुसंधान करण री जरूरत हैं कार्यक्रम मांय केंद्रीय कृषि राज्य मंत्री भागीरथ चौधरी कह्यो के इन्सान रो अस्तित्व बणायो राखण सारू खेती रा कुदरती तरीका काम लेवण व्हेलां राज्यपाल ने 'फसल अवशेष प्रबंधन हेतु स्टबल चॉपर सह स्प्रेडर' पोथी रो विमोचन कीनो अर विश्वविद्यालय री ओर ऊं विकसित करी ज्यो स्टबल चॉपर सह स्प्रेडर जनता ने सूप्यों वे विश्वविद्यालय कानी ऊं लगायी ज्यी प्रदर्शनी ई देखीं

000

हॉकी रा महान खिलाड़ी मेजर ध्यानचंद री जन्म गांठ रे मौके आज वां ने सिरधा भाव सागे याद कर्या जा रह्या हैं वां री जन्मगांठ खेल दिवस रा तौर ऊं मणायी जावे हैं ई मौके राज्य मांय ई केई कार्यक्रम राख्यी ज्यां राजधानी जयपुर मांय रैली निकाली ज्यीं राजस्थान विश्वविद्यालय मांय न्यारी-न्यारी होड़ां राख्यी ज्यीं सवाईमाधोपुर जिला मांय जिला खेलकूद प्रशिक्षण केंद्र ऊं आज मैराथन दौड़ राख्यी ज्यी, जिण मांय मोटी तादाद मांय अहलकार, कर्मचारी, पुलिस वाळा अर खिलाड़ी सिरकत कीनीं मैराथन दौड़ पाछे श्रमदान करी ज्यो अर

पौधा रोपी ज्यां केंद्रीय संचार ब्यूरो रा क्षेत्रीय कार्यालय री ओर ऊं भगवतगढ़ मांय संगोष्ठी राख्यी ज्यीं ईं मौके विद्यार्थियां री रस्सा कशी होड़ राख्यी ज्यी अर जीतण वाळां ने ईनाम दिया ज्यां श्रीगंगानगर मांय मणाया जा रह्या खेल सप्ताह रे दौरान खालसा स्कूल मांय हॉकी मैच राख्यी ज्यो अर खिलाड़िया ने फिट इण्डिया री शपथ दिरायी ज्यीं **भरतपुर** रा महाराजा सूरजमल ब्रज विश्वविद्यालय मांय ईं खेल सप्ताह रे दौरान हॉकी, दौड़, शतरंज, टेबल टेनिस अर गोला फैंक सरीखी न्यारी-न्यारी होड़ां राख्यी जा रही हैं वठे आज राष्ट्रीय स्तर रा हॉकी खिलाड़ियां रो मान करी ज्यो **केकड़ी** जिला रा मीणां का नया गांव मांय **"आओ खेलें: सभी खेलें"** थीम माथे कार्यक्रम राख्यी ज्यां आं मांय बच्चा 100 अर 200 मीटर री दौड़, चम्मच रेस, सितोलिया, जलेबी खावण अर फुटबॉल री होडां मांय सिरकत कीनीं **अजमेर** रा स्कूल-कॉलेजां माय ईं खेलकूद री न्यारी-न्यारी होड़ां राख्यी ज्यीं बारां रा पीएम श्री केन्द्रीय विद्यालय मांय खेलां री न्यारी-न्यारी होड़ा राख्यी ज्यी अर विद्यार्थियां ने खेलां रा महत्त्व रा बारा मांय जाणकारी दीरीजीं **सांचौर** रा गोलासन मांय हॉकी रो फाइनल मुकाबलो खेली ज्यो जिण मांय गोलासन री सीनियर टीम गोलासन री जूनियर टीम ने 4-2 ऊं शिकस्त दीनीं **बांसवाड़ा** जिला रा अमरथून री सरकारी सीनियर सैकेण्डरी स्कूल मांय खेल दिवस रे मौके खास कार्यक्रम राख्यी ज्यो वठे जिला स्तर रा कार्यक्रम मांय नगर परिषद ऊं स्कूली विद्यार्थियां री मैराथन दौड़ राख्यी ज्यीं

केंद्रीय संचार ब्यूरो रा क्षेत्रीय कार्यालय **सिरोही** री ओर ऊं वेराविलपुर री सरकारी सीनियर सैकेण्डरी स्कूल मांय राष्ट्रीय खेल दिवस संगोष्ठी, बोरी दौड़ अर नींबू चम्मच दौड़ राख्यी ज्यी अर फिट इंडिया री शपथ दिरायी ज्यी अर जीतण वाळां ने ईनाम दिया ज्यां

000

प्रदेश मांय हाल तांई सामान्य ऊं डोढ़ा ऊं बत्तो मेह बरस ग्यो हैं कुछ जिलां रे अलावा घणखर जिला मांय सामान्य ऊं बत्ती बिरखा व्ही हैं ऊगणी हलका मांय सामान्य ऊं करीब 38 फीसदी जद के

आतूणी हलका मांय सामान्य ऊं 75 फीसदी बत्तो पाणी बरस्यो हैं मौसम विभाग रे मुजब दौसा जिला मांय हाल तांई सब ऊं बत्ती 1 हजार 148 मिलीमीटर बिरखा व्ही हैं सवाईमाधोपुर मांय एक हजार 43, करौली मांय करीब एक हजार अर टोंक मांय 972 मिलीमीटर बिरखा दर्ज करी ज्यी हैं आतूणी हलका रा जैसलमेर ज़िला मांय सामान्य ऊं 162 फीसदी पाणी बरस्यो दूजी कानी सिरौही, झालावाड़ अर डूंगरपुर ज़िला मांय औसत ऊं थोड़ो कम मेह बरस्यो हैं प्रदेश रा न्यारा—न्यारा हलकां मांय व्हे रही बिरखा ऊं नदी—नाळां मांय लगातार पाणी आ रह्यो हैं **सवाईमाधोपुर** ज़िला मांय आज दोपहर पाछे करीब आधा घंटा तांई बिरखा व्हीं **डूंगरपुर** ज़िला मांय लारला तीन—चार दिन व्हे रही बिरखा ऊं तळावां अर बांधा मांय लगातार पाणी आ रह्यो हैं **सिरौही** ज़िला रा आबूरोड़ हलका मांय एक जणो रपट पार करती बगत बरसाती नाळा मांय बह ग्यो सिरौही ज़िला री मीरपुर नदी मांय पाणी मांय फंसी बकरियां ने गांव वाळा मानव श्रृंखला बणा र बचायीं ईं बीचे टोंक ज़िला रा बीसलपुर बंधा मांय लगातार पाणी आवण ऊं इण मांय पाणी रो लेवल 314 दशमलव 40 आर एल मीटर व्हे ग्यो हैं

000

बाडमेर रा जांबाज फौजी हवलदार नखत सिंह रा पार्थिव शरीर रो आज दोपहरां पाछे वां रा पैतृक गांव हरसाणी मांय पूरा फौजी मान सागे दाग कर दियो ज्यो दाग मांय बाडमेर रा सांसद उम्मेदाराम बेनीवाल, जिला कलेक्टर निशांत जैन, एस पी नरेन्द्र सिंह मीना, जनता रा नुमाइन्दा, फौज, पुलिस अर प्रशासन रा अहलकार अर मोटी तादाद मांय आमजन मौजूद रह्यां

अरुणाचल प्रदेश मांय तैनात फौज री 19 ग्रेनेडियर्स रा हवलदार नखत सिंह ऑपरेशन राईनो रे दौरान 27 अगस्त ने व्ही वाहन दुर्घटना मांय वीर गति हासिल कीनी हीं

000